

之說張璉聞之走書邀夔夔笑曰吾豈以是博官耶卒不應會繼母年高乞歸銘其室左曰不欺右曰養正嘗曰人能于義利二字分明便可上達繼母卒夔年已七十四猶悲號爲孺子慕生平恂恂若不能言及大節所存則立髮洒淚奮袂而起請祀宋末死事諸人修謝應芳墓

吳環字鳴和幼好學事父母至孝正德十四年舉人授徒無所請謁族人侵環屋址環口占曰普天之下皆王土再過來些也不妨族人慙沮晚年僅舉一子爲隣人所毆環整衣冠詣毆者謝教子不謹里中感誦沿溪構小樓度書坐卧其上清晨朗誦聲徹里許四應會試不第選福建興化府通判不赴年八十一卒

謝歸字石洲有幹才敦任恤隣人以非罪陷獄求贖銀不可得歸慨然助之罪得減弟麟字汝玉與人交犯而不校鄰有鬻妻者已受直中夜哭別隣聞告於兄予之金且曰後有不給可告我夫得金急反其直而娶者已在途語之曰賴謝公之賜不鬻妻矣娶者感嘆去與兄歸同居數十年兒童婢妾無詬誶聲

錢黼號遇齋嘉靖間以貢選直隸冀州州判主辦內府薪炭闖人挾勢乾沒主者多被累黼棄官歸爲人剛直人有過面折之邑中士大夫家居者黼歸最先年最高皆推尊之贈以詩歌題其卷曰高尙

邱鑒字朝洪年十二喪父與弟鑒廬墓三年中式嘉靖七年鄉試